



PROPOSTA DA ALCALDÍA PARA A CANDIDATURA DE BUEU COMO CIDADE AMIGA DA INFANCIA E DA ADOLESCENCIA PARA O PERÍODO 2019-2020

EXPOSICIÓN DE MOTIVOS

Cidades Amigas da Infancia (CFCI polas súas siglas en inglés) é unha iniciativa internacional liderada por UNICEF que apoia aos gobernos locais no seu rol de garante dos dereitos dos nenos e nenas a nivel local, baixo o marco da Convención sobre os Dereitos do Neno e da Nena. A iniciativa púxose en marcha en 1996 por parte de UNICEF e ONU-Hábitat co fin de levar a cabo a resolución aprobada durante a segunda Conferencia das Nacións Unidas sobre os Asentamentos Humanos (Hábitat II), cuxo obxectivo é facer que as cidades sexan lugares habitables para todos. Esta Conferencia das Nacións Unidas declarou que o benestar dos nenos e nenas é o principal indicador dun hábitat saudable, unha sociedade democrática e de bo goberno. Actualmente esta iniciativa ten presenza en máis de 40 países no mundo. A iniciativa Cidades Amigas da Infancia ten como visión que todo neno, nena e adolescente goce da súa infancia e xuventude e desenvolva todo o seu potencial a través da realización igualitaria dos seus dereitos nas súas cidades e comunidades. Co fin de facer realidade esta visión, os gobernos locais e os seus socios identifican as súas metas (resultados) dentro das cinco esferas de obxectivos xerais, definidos no Marco para a Acción da iniciativa.

No estado español esta iniciativa vense implementando dende 2001, e desenvólvese baixo o liderado de UNICEF Comité Español en alianza con: O Ministerio de Sanidade, Consumo e Benestar Social (MSCBS) A Federación Española de Municipios e Provincias (FEMP) O Instituto Universitario de Necesidades e Dereitos da Infancia e Adolescencia (IUNDIA). As catro entidades constitúen a Secretaría Permanente do Programa, órgano que define a estratexia estatal e toma a decisión final sobre os gobernos locais recoñecidos como Cidades Amigas da Infancia en España. A área de políticas locais de infancia e participación de UNICEF Comité Español, constitúe ademais, a Secretaria Técnica da Iniciativa.

Cada dous anos UNICEF Comité Español abre unha convocatoria co fin de recoñecer os gobernos locais que poden demostrar o seu compromiso cos dereitos da infancia e adolescencia da súa localidade.

Este recoñecemento ten unha vixencia de catro anos e implica que o goberno local cumpre cos requisitos establecidos nas bases que se presentan neste documento e asume unha serie de compromisos mediante a firma dun convenio, entre eles, entregar un informe intermedio aos dous anos, onde comunica os avances na implementación do seu plan local de infancia e adolescencia (PLIA).



Ata a data, a iniciativa ten presenza en todas as Comunidades Autónomas, dentro do Estado Español, contando con 277 gobernos locais recoñecidos, onde reside aproximadamente o 42% dos nenos, nenas e adolescentes.

Os requisitos que se piden para levar a cabo a solicitude para formar parte desta rede son:

- Contar cun órgano de participación infantil e adolescente activo, promovido, apoiado e recoñecido polo goberno local antes do 29 de febreiro 2020, que iniciase, como mínimo, a súa actividade en outono de 2019. Neste sentido desde o goberno local contamos cunha iniciativa periódica establecida dentro do I Plan de Igualdade Intercentros no que se celebra un pleno no que participan coa súas propostas o alumnado de todos os centros educativos da vila, tendo lugar o primeiro o pasado ano coa participación do alumnado dos centros da parroquia de Bueu, sendo nesta segunda edición os protagonistas o alumnado dos Ceip A Torre e Montemogos.

- Ter levado a pleno municipal a solicitude de participación – carta de interese- nesta convocatoria e ter conseguido a maioría suficiente para a súa aprobación. Será necesario aportar este documento de forma telemática antes do 29 de febreiro 2020.

- Contar cun mecanismo de coordinación interna, que teña como obxectivo transversalizar a política de infancia dentro do goberno local. Debe estar constituído e en funcionamento antes do 29 de febreiro de 2020.

- Contar cun diagnóstico, elaborado de forma participativa e baseado en datos, da situación da infancia e adolescencia que vive no ámbito xeográfico do goberno local, dos recursos e servizos cos que se conta para a súa atención, así como de todos aqueles aspectos que se consideren relevantes. O diagnóstico permitirá resaltar os principais desafíos en temas de infancia e adolescencia aos que se enfronta o goberno local. As entidades locais solicitantes deberán entregar o documento do seu diagnóstico, e informar a través da ferramenta online de xestión da información, antes do 30 de xuño de 2020.

- Contar, baseado no diagnóstico anteriormente sinalado e elaborado de forma participativa, co plan local de infancia e adolescencia coa súa respectiva previsión orzamentaria. O plan debe incluír indicadores que faciliten o seguimento da súa implementación. A data de entrega de información asociada a este requisito na plataforma online e subir o plan elaborado será como máximo ata o 30 de xuño de 2020.

- Aprobar no pleno municipal o plan local de infancia e adolescencia do goberno local. A data máxima asociada a este requisito é: 30 de setembro de 2020.



-Realizar un exercicio de transparencia e fomentar o bo goberno e a rendición de contas, mediante a publicación permanente na páxina web do goberno local, do diagnóstico e do plan local de infancia e adolescencia, co fin de que poidan ser consultados pola cidadanía e calquera persoa ou entidade interesada. A data máxima asociada a este requisito é: 30 de setembro de 2020.

O pasado 31.01.2020 celebrouse unha Xunta de Voceiros na que, por parte da Alcaldía e do concelleiro de cultura e educación, se dá conta deste asunto e das causas polas que debe tramitarse na sesión ordinaria do pleno da corporación do mes de febreiro.

ACORDOS:

1. Que o pleno da Corporación aprobe o inicio dos trámites para que o goberno local presente a candidatura de Bueu como Cidade Amiga da Infancia e da Adolescencia para o período 2019-2020.
2. Que se cre unha Mesa Pola Infancia e a Adolescencia dentro do goberno local que coordine a través das diferentes concellerías o traballo dos departamentos para o cumprimento dos requirimentos e leve a cabo a planificación dos mesmos.
3. Que se poña en funcionamento unha vez aprobado de xeito definitivo o regulamento de participación cidadá o Consello da Infancia e da Adolescencia.